

每週經課朗誦經文(巴克禮漢羅/教羅)2013/09/29

共同經課 - 1 耶利米書三十二章一節~三 a 節, 六節~十五節

1 猶大王 Se-ti-ka 第十年, 就是 Nî-pò-kah-nî-sat 十八年, 有耶和華 ê 話臨到耶利米。2 Hit 時, 巴比倫王 ê 軍隊圍困耶路撒冷, 先知耶利米關 tī 拘留所 ê 院, tī 猶大王 ê 厝。3 因為猶大王 Se-ti-ka 已經將伊關禁, 講, 你啥事讖語講, 耶和華 án-ni 講, 看 ah, 我 beh 將 chit-ê 城交 tī 巴比倫王 ê 手, 伊 beh 取伊; 6 耶利米講, 耶和華 ê 話臨到我講, 7 看 ah, 你 ê 叔 Sa-liông ê kiáⁿ Hap-ná-biát beh 來見你, 講, 我 tī A-ná-tút hit 坵田, 請你買伊; 因為贖回 ê 權在 tī 你, 你 thang 買。8 我 ê 叔 ê kiáⁿ Hap-ná-biát 果然照耶和華 ê 話來拘留所 ê 院 chhē 我, 對我講, 我 tī 便雅憫 ê 境內, A-ná-tút hit 坵田, 請你買; 因為承接 kap 贖回 ê 權在 tī 你, 你 tiòh 買做你 ê; 我就知這是耶和華 ê 話。9 我就 tùi 我 ê 叔 ê kiáⁿ, Hap-ná-biát, 買 A-ná-tút hit 坵田, 秤(phêng)hit-ê 價銀 hō伊, 共十七 siá-khek-lèk。10 我 tī 契面簽名, 將契封密; koh 請人來做知見, 亦用天秤秤銀 hō伊。11 我就 thèh 照規例所立 ê 買契, 就是封密 ê hit 張, kap 無封 ê hit 張; 12 當我 ê 叔 ê kiáⁿ Hap-ná-biát, kap 簽名 tī 契面 chiah-ê 知見, 以及坐 tī 拘留所院內一切猶大人 ê 面前, 將買賣 ê 契交 hō Má-se-ngá ê 孫, Nî-lī-a ê kiáⁿ, Pa-liók。13 當 in 面前, 我吩咐 Pa-liók 講, 14 萬軍 ê 耶和華, 以色列 ê 上帝, án-ni 講, Tiòh 將封密 ê kap 無封 ê, chit 兩張契, 收 tī 磁器 ê 內面, thang 留存 choē-choē 日。15 因為萬軍 ê 耶和華, 以色列 ê 上帝, án-ni 講, 將來 tī chit 所在人 beh koh 買厝宅、田園, kap 葡萄園。

共同經課 - 2 詩篇九十一篇一節~六節, 十四節~十六節

1 Tiàm tī 至高 ê 隱密 ê 所在 ê, Hit-ê 人 beh khiā 起 tī 全能 ê ê 蔭影。2 論到耶和華, 我 beh 講, 伊是我逃閃 ê 所在, 是我 ê 山寨; 是我 ê 上帝, 我所 oá 靠 ê。3 因為伊 beh 救你脫離 tng 烏 á ê 羅網, Kap 毒害 ê 瘟疫。4 伊 beh 用伊 ê 翼股 àⁿ 你, 你 beh bih tī 伊 ê 翼下, 伊 ê 誠實是大細 ê 藤牌。5 你 m̄免驚暝間 ê 驚惶, Á 是日時 teh 飛 ê 箭。6 亦免驚烏暗中流行 ê 瘟疫, Á 是日中晝滅無人 ê 毒症。14 因為伊真疼我, 我就 beh 救伊; 因為伊 bat 我 ê 名, 我就 beh 安置伊 tī 高 ê 所在。15 伊求叫我, 我就 beh in 伊; 伊 tī 危急 ê 時, 我 beh kap 伊 tī-teh; 我 beh 救伊, hō伊尊貴。16 我 beh 用長歲壽 hō伊滿足, Hō伊看見我 ê 救恩。

共同經課 - 3 提摩太前書六章六節~十九節

6 但是敬虔 kiam 知足就是大利路。7 因為咱出世無帶甚麼來, 過世也 boē-oē 帶甚麼去。8 但是有 thang 食穿, 咱就 beh 知足。9 獨獨 hiah-ê 想 beh 發財 ê, 就陷落迷惑 kap 羅網, 以及 choē-choē 戇戇有損害 ê 私慾, 就是 hō人沉落 tī 敗壞 kap 滅無 ê。10 因為貪財是萬惡 ê 根源; 有人戀慕伊, 就受迷惑來離開道理, 用 choē-choē 艱苦家己刺鑿。11 獨獨你, 屬上帝 ê 人 ah, tiòh 閃避 chiah-ê; 來追 jip 義、敬虔、信、仁愛、吞忍、溫柔。12 Tiòh 爭戰信 ê 好爭戰; 將永活擒 tiâu-tiâu, 你 ê 受召就是為 tiòh chit-ê; 你也 bat 承認好 ê 志願 tī choē-choē 干證 ê 人 ê 面前。13 我 tī 賞賜活命 hō萬項有 ê 上帝 ê 面前, 以及對本丟彼拉多做好 ê 干證 ê 基督耶穌 ê 面前, 吩咐你, 14 tiòh 守 chit-ê 命令, 無瑕疵, 無 thang 嫌, 到咱 ê 主耶穌基督 ê 顯現。15 到期大福氣, 獨一有權能, 萬王 ê 王, 萬主 ê 主, beh 顯明伊, 16 就是獨一 boē 死, tiàm-tī boē-thang 近 oá ê 光, 人所未 bat 看見, 也 boē-oē 看見 ê; 願尊貴 kap 永遠 ê 權勢歸 tī 伊。À-bêng。17 今世好額 ê 人, 你 tiòh 吩咐 in, 心志莫得自高, 莫得 hē in ê ng 望 tī 無定 tiòh ê 錢財, tiòh hē tī 將萬物滿滿 hō咱享受 ê 上帝; 18 koh 吩咐 in 行好事, 好額 tī 好所行, 歡喜賑濟, 甘願分 hō人, 19 為 tiòh 家己積聚好 ê 地基, 備辦後來 ê 事, hō in 擒 tiâu 真 ê 活命。

共同經課 - 4 路加福音十六章十九節~三十一節

19 有一個富人穿紫色 kap 幼苧布 ê 衣裳, tàk 日奢華宴樂; 20 koh 有一個乞食名拉撒路, 遍身生痛; 21 人 hē 伊 tī 富人 ê 大門口, ài 將富人桌腳所 ka-láuh ê 來度飽; 狗也來 chī 伊生痛 ê 位。22 Sòng-hiong 人死, hō 天使扶伊到亞伯拉罕 ê 胸前; 富人也死, 續埋葬。23 Tī 陰間, 痛苦 ê 中間, kiáh 目遠遠看見亞伯拉罕, koh 拉撒路 tī 伊 ê 胸前。24 就叫講, 我 ê 祖亞伯拉罕 ah, 可憐我, 差拉撒路用指頭 á 尾 ùn 水來涼我 ê 舌, 因為我 tī chit 火燄中真悽慘。25 但是亞伯拉罕講, Kiáⁿ ah, tiòh 記得你在生享受你 ê 福氣, 拉撒路受 tiòh 艱苦; taⁿ 伊 tī chia 得 tiòh 安慰, 也你受悽慘。26 M̄-nā án-ni, tī 阮 kap lín ê 中間有大深淵隔 teh, 致到 beh tùi chia 過去 lín hia boē 能, tùi hia 過來阮 chia 也 boē 能。27 伊就講, 既然 án-ni, 求祖你差拉撒路去阮父 ê 厝; 28 因為我有五個兄弟, hō伊對 in 做干證, 免得 in 也到 chit-ê 痛苦 ê 所在。29 亞伯拉罕講, In 有摩西 kap hiah-ê 先知, thang 聽 in。30 應講, 我 ê 祖亞伯拉罕 ah, boē lah; 若有人 tùi 死人中去 chhē in, in 就 beh 反悔。31 亞伯拉罕 kā 伊講, In 若 m̄聽摩西 kap 先知, 就有人 tùi 死人中 koh 活, in 也 m̄受苦勸。